

道德真經四子古道集解卷之一

過一

御製

天地定位 陰陽協和 星辰順度 日月昭明
 寒暑應候 兩陽以時 山嶽靖謐 河海澄清
 草木蕃庶 魚鼈咸若 家和戶寧 衣食充足
 禮讓興行 教化修明 風俗敦厚 刑罰不用
 華夏歸仁 四夷賓服 邦國鞏固 宗社尊安
 景運隆長 本支萬世 正統十年十一月十一日



道德真經四子古道集解序

過一

僕草澤無名之野人也素不以進取介意及
冠之後酷嗜恬淡之樂究丹經卜筮之術至
於晚年讀古人書披閱諸子探賸聃經之奧
章章有旨可謂深矣遠矣因觀諸家解註言
多放誕互起異端朱紫般亂殆越百家失其
古道本真良可歎也獨莊列文庚四子之書
廼老氏門人親授五千言教各著撰義與相
同其餘諸解紛紜肆辯徒以筆舌為功虛无
為用了無所執又豈可與四子同日而語哉

僕昔隨仕嘗遊京都得叅高道講師略扣玄
關盡為空性之說不能述道之一二內省不
疚深其造道而自得欲以極世欲之多蔽悼
聖道之不行又恐膠疑泥惑之流翻起蜂喧
之議故撫其四子引其真經集為一編計一

過一

十卷以破雷同之說因目之曰四子古道義
又述經史疏十卷以相為之表裏今幸苟完
是論非當恃其臆說不惟新當時聞見抑為
千古之龜鑑也請好事君子幸無哂焉偃息
之暇因援筆而直書之嘗大定十九年己亥

歲元日古襄寇才質謹序

道德真經四子古道集解卷之一

古襄寇才質集

道可道章第一

此章南華經言天地無為不言之教者古

之所大也而三皇之所以共美也古
之王天下者奚為哉天地無為而已
矣古者大道不稱大辯不言道昭而
不道言辯而不及後世孰知不言之

教不道之道若有能知此之謂天府
大道無為天地不言之大教矣天常
無欲無為自
化無教言也

道可道

通玄經道原篇曰夫仁義事生者應變而
動變生於時無常之行故道可道非常道

過一

二

非常道

洞靈經曰後世仁義禮樂人事小成之道
曰可之教飾辭政敗非常道也

名可名

靈曰書經故入言之而後生之言出於

通玄經曰書學者人言之所生也言出於
智智者詐偽不知於道夫著於竹帛之書
鏤於金石之言可傳於人者非藏書也故
非名可名非常名也

非常名

洞靈真經曰後世多誦方書或學技藝通
說之言曰可言之言翦巧綺濫非常言也
無名天地之始

通玄經曰無名則無形大道無形即靜而
無為大常之道不道之道芒乎大哉此之

謂天府大道無教也

有名萬物之母

通玄經曰有名則有形天地有形即靜而
不言大常之言不言之言芒乎大哉此之
謂天府天地無言也

過一

常無欲以觀其妙

三

南華經曰有天道焉無為而尊天道也天
地大智無為閑閑大道無為自然之妙也
常有欲以觀其徼

南華經曰有人道焉有為而卑人道也人

學小智有為閒閒人道有為而徼倖也通
玄經曰有為也則傷而徼末也

此兩者

通玄經曰循天者與道遊也隨人者為俗
學也南華經曰天道之與人道也相去遠
矣不可不察也

同出

南華經曰合異以為同通玄經曰聖人從
事於教同心而同歸

而異名

南華經曰散同以為異通玄經曰後世五
帝三王殊事而異路五帝異道而覆天下
三王殊事因時而變而異言也

同謂之玄

通玄經曰上古聖人與天同心與道同體

謂之無為玄妙大道矣

玄之又玄

南華經曰夫道深之又深而能物焉神之
又神而能精焉

衆妙之門

通玄經曰道者一立而生萬物故萬事之
根皆出道之一門南華經曰萬物有乎生
而莫見其根有乎出而莫見其門其來無
跡其往無涯無門無房四達之皇皇也

天下皆知章第二

此章通玄經言聖人者通於靈府與

造化者為人執玄德於心而化動若
神無一言而大動天下是以天心動
化者也是故不言之教芒乎大哉不
言之辯不道之道若或通焉謂之天
府大道無為天地不言之教萬物自
化不用小成美有為言民惡不善也

天下

通玄經曰後世無道治天下天下之賊也

有為也則為天下用而不足治上有為也

下亦有為也

皆知美之為美

通玄經微明篇曰後世知學淺於道矣古

不知學淺於道矣今之知學外於欲矣古

不知學內於性矣後世孰知知學為不知

道古不知學為知道乎故天下皆知美之

為美斯惡矣

斯惡矣

通玄經曰夫道不可以聰聞聰聞非道乃

學也道不可以明見明見非道乃學也道
不可以辯言辯言非道乃學也斯惡矣
皆知善之為善

南華經无始曰古不知學深於道矣今知
之學淺於道矣弗知內性知學外欲於是

過一

五

泰清中而歎曰古弗知學乃知乎道後世
孰知不知之知乃知道乎故天下皆知善
之為善斯不善矣

斯不善矣

南華經曰夫道不可以聰聞聰聞非道乃

學也道不可以明見明見非道乃學也道
不可以辯言辯言非道乃學也斯不善矣
故有無之相生

通玄經曰人君之道有無相生也
難易之相成

通玄經曰古者以正教化易而必成後世
以邪教化難而必敗捨其易必成從事於
難必敗故難易相成也

長短之相形

通玄經曰古者民童蒙長短不相形後世

有為長短之相形

高下之相傾

通玄經曰古者民童蒙高下不相傾輕重均則衡不傾無偏覆也後世高下之相傾音聲之相和

南華經曰大人之教若聲之於響通玄經曰如響之應聲上唱下和也

前後之相隨

南華經曰大人之教若形之於影通玄經曰如影之像形前後相隨也

是以聖人

通玄經曰大道之本在於法天上聖法天
法天者法天地之道也虛靜無為是謂天
地

處無為之事

過一

通玄經曰古王道者處無為之事

六

行不言之教

通玄經曰古王道者行不言之教

萬物

南華經曰今計物之為數不止於萬而期

曰萬物者以數之多者號而讀之也故曰
萬物

作而不辭

南華經曰天不產而萬物育地不產而萬
物化

生而不有

通玄經曰道生物也莫見其所養而萬物
長此之謂神明無為之道也

為而不恃

通玄經曰道成物也莫見其所為而萬物

成此之謂神明無為之道也

功成不居

通玄經曰不居者無為也無為則不居無
名無言也大道無為不知所為者而功自
成

過一

七

夫唯不居

通玄經曰不居者即處無為不動無言也
是以不去

南華經曰道之無為而才自然矣至人之

於德也不修而物不能離焉

不尚賢章第三

此章南華經天道篇言古者帝王之德以

天地為宗以道德為主以無為為常無為也則用天下而有餘是以太古聖人之治天下虚心實腹乃無為也常使民無知無欲不敢有為不尚賢貴貨無為則治也

不尚賢

南華經曰上古大道至德之世不尚賢不

使能上如標枝民如野鹿

使民不爭

通玄經下德篇曰後世人之情性皆願賢

已而疾不及人願賢即爭心生疾不及人

則怨爭生怨爭生則心亂而氣逆古者聖
王退爭怨爭不生即心治而氣順故曰
不尚賢使民不爭

不責難得之貨

通玄經上義曰古者為國之道其導民也

不貴難得之貨不重無用之物

使民不為盜

南華經曰古者藏金於山藏珠於淵不利
貨財也

不見可欲

通玄經曰古聖不見可欲心與神靜乃無欲也

使心不亂

通玄經曰後世人君好色弗使風儀而國家昏亂其積至於淫泆之難矣故治人者

過一

慎所以感之冲虛經曰後世君淫民淫古聖淡然無欲而民自樸

是以聖人之治

通玄經曰為治之本務在無為是以聖人之治虛無寂漠脩自然之道淡然無為而

天下治

虛其心

通玄經曰其聽治也虛心得道聖人虛心
無有者且不足也見不足故能成其賢奢
者不長

實其腹

通玄經曰古者聖人守內而不失外則胃
腹充實而嗜欲寡也

弱其志

通玄經曰其聽治也弱志得道志弱事強

安靜不能不慮而得

強其骨

通玄經曰古者至人之治也棄其聰明滅其文章即合於神明無為之道神明得其內者五藏寧思慮平筋骨勁強耳目聰明

過一

九

堅強而不匱無所不逮

常使民

對南華經曰古者無為也則用天下而有餘治上無為也下亦無為也

無知無欲

曰古者同乎無欲其無不歸同乎

南華經曰古者同乎無知其德不離同乎
無欲則民素樸

使夫知者不敢為也

南華經曰上必無為而用天下下必有為
為天下用此不易之道也

為無為

通玄經曰為無為事無事知不知也南華

經曰帝王之務在於無為

則無不治矣

通玄經曰古者聖人淡然無為而無不為

也淡然無治而無不治也

道冲章第四

此章南華經言夫道冲和之氣和養萬物也無

所不在是處有之在螻蟻蠢物無不
養育何其道下挫其銳邪在瓦甃土
石無不成就何其道愈甚散其紛邪
在穉稗草木無不生成其道愈下和
其光耶在屎溺糞壤不揀穢汙同其
塵也湛兮似或存吾不知其大象乃

誰氏之子象帝之
先天象道之氣也

道冲

通玄經曰大道陰陽和氣澄清

而用之

通玄經微明篇曰道冲而用之又不足也

或不盈

通玄經曰道者和氣沖而不盈

淵兮似萬物之宗

南華經曰天道沖和之氣生成萬物也無所不在是處有之

過一

十

挫其銳

通玄經曰夫道挫其銳者無暴惡也

解其紛

通玄經曰夫道解其紛無爭亂也

和其光

通玄經曰夫道和其光者無怨逆也

同其塵

通玄經曰夫道和其塵同塵穢也

湛兮似或存

通玄經曰天以之清湛然澄靜

吾不知誰之子

南華經曰吾不知其誰氏之子

象帝之先

南華經曰冉求問於仲尼曰未有形道之

子孫而以有形天地子孫可乎仲尼曰可

有形先天地生者皆物邪物於物者道非

物物

天地章第五

此章南華經知北遊篇言天地有大美而不言

四時有明法而不議萬物有成理而
不說古聖人者原天地無為之美達
萬物自然之理是故至人無為大聖
不作觀於天地無為之謂也不教仁

義小成有為多言之事以百姓為草
狗隨聖人之風聲自然偃化天下治

天地不仁

通玄經自然篇曰天地之道以德為主道

為之命物以自正至微其內不以事貴不

須禮而莊故道立而不教明照而不察道
立而不教者不奪人能也明照而不察者
不害其事也夫教道者逆於德害於物故
陰陽四時五行同道而異理萬物同情而
異形智者不相教能者不相受故天地不
仁以萬物為芻狗

以萬物為芻狗

通玄經曰天地非有為焉正其道而物自
然陰陽四時非生萬物也雨露時降非養
草木也神明接陰陽和萬物生矣

聖人不仁

通玄經曰聖人立法以導民之心各使自然故生者無德死者無怨夫慈愛仁義者近狹之道也狹者入大而迷近者行遠而感聖人入大不迷行遠不感常虛自守可

以為極是謂天德故聖人不仁以百姓為芻狗

以百姓為芻狗

通玄經曰百姓聽上如草從風其於化也

若風之靡草

天地之間

南華經曰地籟則衆竅是也夫籟者大塊
噫氣其名為風吹萬不同而使其自然也
咸其自取萬物怒號者其誰使耶
其猶橐籥乎

過一

十二

南華經曰人籟則比竹是已風唯無作作
則萬物鳴號動而為聲也冷風則小和飄
風則大和猶吹人籟比竹管籥之聲乎
虛而不屈

通玄經曰上聖法天虛靜無為治天地之

道也知虛靜之道乃能終始是謂天地也
動而愈出

沖虛經曰唐之治天下遊於康衢聞兒童
謠曰立我蒸民莫匪爾極不識不知順帝
之則唐喜問曰誰教爾為此謠言乎童兒

曰古詩也

多言數窮

通玄經曰後世民知書而道衰知數而德
衰任數者勞而无功書數者人言之所生
也言出於智智者詐偽不知於道多言數

窮不如守中
沖虛經曰齊魯多機巧有善書數者

不如守中

通玄經曰為教之本在去小成體道者佚而不窮神化無為天下相應微矣此所謂

過一

十三

天地不言之教芒乎大哉後世若有能知此之謂天府大道無為天地不言之教矣

谷神章第六

此章南華經言大道無形有情鬼神帝生天生

地天得一氣清虛主其運也地得一氣安寧處其用也故天地谷神不死

是謂陰陽玄牝造化之神玄牝陰陽之門戶是運天地根天則綿綿若存

地則用之不勤
道天地之根也

谷神不死

沖虛經曰天地常生常化者無時不生無

時不化四時爾谷神不死

是謂玄牝

沖虛經曰大道常生常化無物不生無物

不化陰陽爾是謂玄牝

玄牝之門

沖虛經曰大道陰陽疑獨其道不可窮玄

牝之門

是謂天地根

沖虛經曰天地四時往復其際不可終是
謂天地根

綿綿若存

沖虛經曰綿綿若存通玄經曰大道至神

綿綿若存故能天運南華經曰天其運也
用之不勤

沖虛經曰用之不勤南華經曰地處用也
通玄經曰用之不勤故能地埶

天長地久章第七

此章南華經則陽
篇言大道者氣之

大者也天地者形之大者也道者為之公天地無私也故能長久是以古之聖人將欲禪位為帝者奉天至公無私覆載也天下長久後其身而身先外其身而身存以其無私耶故成其私

天長地久

南華經曰天無私覆無不覆也地無私載

過一

十四

無不載也

天地所以能長且久者

通玄經曰大道者氣之大者也天地者形之大者也道者為之公天地無私也故能

長久

以其不自生

南華經曰若天之自高地之自厚日月之自明夫何脩長焉以其不自生故能長久

故能長生
通玄經曰天地無私去也無私就也故能

長久

是以聖人

沖虛經曰唐召於舜禪以天下舜不辭而受之南華經曰帝王殊禪三代殊繼差其時逆其俗者謂之篡夫當其時順其俗者

謂之義之徒

後其時

通玄經曰天地之道先以後為主聖人法
道之退者所以自後也後以自安
而身先

過一

十五

通玄經曰退則故能先此天地之所成也
以退取先矣

外其身

通玄經曰天地之道大以小為本聖人法
道之小者所以自卑也卑以自衛

而身存

通玄經曰小則故能大此天道之所成也

以亡取存

非以其無私耶

通玄經曰古者聖人與天地相保公正無

私

故能成其私

南華經曰上古聖人無私德也其無私德

其無私福

上善若水章第八

此章通玄經道原
篇言夫水之為道

也上天為雨露下地為潤澤萬物不
得不生百事不得不成任天下取與
稟受萬物與天地共同是謂至德水
柔近於道夫上古聖人法天善道若
水之
十善

上善若水

通玄經曰天下莫柔弱於水

水善利萬物

通玄經曰夫水之為道也上天為雨露萬
物不得生

又不爭

通玄經曰水流不爭疾去而不遲

處衆人之所惡

通玄經曰澤及蚊虻而不求報

故幾於道

通玄經曰水與天地洪同是謂至德水柔

近於道

過一

十六

居善地

通玄經曰水之為道也下地為潤澤萬物

不得不生

心善淵

通玄經曰水廣不可極深不可測

與善仁

通玄經曰水則富。瞻天下而不既德。

言善信

通玄經曰夫水有餘補不足任天下取與

政善治

通玄經曰夫水息耗滅益過於不訛

事善能

通玄經曰夫水利貫金石強勝天下

動善時

通玄經曰夫水稟受萬物而無先後

夫唯不爭

通玄經曰夫水所以能成天地至德者以其綽約潤達也

故無尤矣

通玄經曰夫水之為道也百事不得不成

過一

十七

長極無窮遠淪無涯大苞羣生施百姓而無費

道德真經四子古道集解卷之一



